

安徽古籍叢書

方龔山詩集

下

〔清〕方文、撰 胡金望、張則桐、校點

黃山書社

方龠山詩集

下

〔清〕方文／撰 胡金望 張則桐／校點



龔山續集前編

四游草

北游草

五言古體

三十二首

都門懷古十六詠

以下丁酉冬作。

黃金臺

在易州，燕昭王築。

燕齊壤相接，累世受侵伐。昭王不勝忿，闕館似宮闕。求賢爲復讎，郭隗充駿骨。果得樂將軍，一戰傾溟渤。千古快斯舉，高臺永不沒。

易

水

在固安，燕太子送荆軻處。

荆卿固烈士，謀略亦太疏。其意有所待，何不稍躊躇？丹既促之行，高生合同車。乃用黃

口兒，事債志不舒。至今易水上，行旅仍悲歎。

黍谷 在懷柔，齊鄒衍吹律處。

鄒生善談天，稷下人士驚。雅游至薊北，道路爭相迎。有谷故陰寒，四月草不生。一爲吹黃鐘，陽氣遂滿盈。種黍實離離，千秋垂令名。

北平城 在薊州，漢李廣嘗爲太守。

赫赫飛將軍，分符守疆場。單于畏其名，不敢踰沙磧。昏夜行草間，射虎乃中石。此石遂千古，觀者咸嘆惜。灤河亦有碣，附會非真跡。

軍都山 在昌平，漢盧植隱處。

董卓亂天紀，舉朝皆側目。強哉盧子幹，抗議獨不辱。權臣欲殺之，間道走上谷。匿影此山中，談經坐茅屋。先主龍潛時，亦在弟子屬。

樓桑村 在涿州，漢昭烈帝所生處。

炎漢運方終，魏吳皆僭竊。中山隆準後，此地生人傑。有桑如葆蓋，已兆飛龍業。高光獲再興，正統賴不絕。至今西南隅，民猶奉昭烈。

徐無山 在豐潤，漢末田疇隱此。

昔有田子春，逃名隱山嶼。魏軍征烏桓，秋水迷失道。君因父兄讎，躬請爲之導。讎復志已愜，爵祿非所好。我今適盧龍，臨風一憑弔。

桑乾河 在良鄉，晉張華所居。

史稱張司空，博物妙天下。卜居此河上，園林定瀟灑。不圖慕容亂，倏化爲平野。悠悠桑乾水，南北通車馬。借問車中人，誰是讀書者？

酈亭 在涿州，北魏酈道元所居。

酈生有故宅，亦在桑乾東。閉戶註水經，江海靡不通。豈惟考據確，兼之文詞工。我今渡

河水，停車遡遺風。斯人不可見，落日鳴孤鴻。

賈峪

在房山，唐賈島所居。

浪仙始爲僧，中歲成進士。當其年少日，讀書乃在此。其詩好幽峭，其人亦相似。薄宦游長江，竟以窮獨死。但令篇什存，何必躋臚仕。

寶莊

在薊州，五代寶禹鈞所居。

恒情愛其子，孰不望繁殖！至於多且貴，天也非人力。寶老五男兒，次第登顯職。雖云積善慶，真宰意莫測。洛陽司馬公，平生作何慝。

柴市

在都城内，宋文文山遇害處。

大宋文相國，浩氣塞乾坤。一朝赴柴市，日月爲之昏。秉彝有同好，立廟太學門。崇祀四百年，凜然忠義存。此道今寂寞，誰與薦蘋蘩。

憫忠寺 在外城，宋謝疊山餓死處。

侍郎隱名姓，賣卜建陽橋。行省忌其忠，劫之來北朝。寧甘首陽餓，不折彭澤腰。畢命此寺中，千古魂未招。我來訪陳迹，霜樹空蕭條。

天壽山

在昌平，有明十三陵在上。

峨峨天壽山，海嶽鍾靈秀。長陵位中央，列聖分左右。萬古所傷心，思陵禮未就。社稷既已移，松柏豈長茂！遙瞻一再拜，潺湲淚霑袖。

西山

在都城西，梵剎極盛，先朝名人題詠頗多。

西山富林泉，出郭未云遠。試問京華客，幾人曾策蹇？先朝屢行幸，諸剎藏琬琰。侍從多名臣，高吟摩碧巘。老僧顧我笑，來游亦何晚。

報國寺

在外城，有古松十餘株，相傳金人所種。

人事易衰謝，天運亦禪代。如何此寺松，五百年猶在。風沙霜雪裏，見者無不愛。但惜勢

倉皇，閑吟得幾輩。惟有素心人，時來一相對。

十月一日人都遇朱山人西長

朔風吹黃沙，白晝爲之黑。有客騎跛驢，衝寒入京國。道上所逢人，不知幾萬億。嗟我山澤癯，曾無一相識。忽有長髯公，披褐立路側。望見遙呼名，驚喜動顏色。問我何時來，行李何處息？牽衣造其廬，咄嗟治朝食。因及去年事，停餐淚霑臆。世人游京師，鮮不求官職。爾我本無營，奚取游向北？西山松柏存，天晴其登陟。

王秘書涓來齋頭夜集

昔游麻姑城，邂逅如故知。忽忽不忍舍，中路遺我詩。一別倏十年，西望長相思。所恨道里遠，山川又間之。尺書且莫寄，重逢定何時？今我有家難，飄零到京師。聞君官著作，讀書先在茲。倉皇求一晤，彼此皆參差。明晨以馬來，迎我過鳳池。握手各興歎，非復當年姿。焚香坐秘閣，酒饌多華滋。日晚不令歸，留宿焉敢辭。上林春萬樹，而我無一枝。燕雀且雙飛，而我無雄雌。富貴固有命，貧賤良可嗤。倘許時相過，盤餐即恩私。

程詹事其相齋頭夜集

神京本宦海，來者不知數。上而至政府，下而至郎署。一落緇塵中，鮮不渝其素。我里程太史，蚤歲翔天路。入爲侍從臣，經術蒙眷顧。出爲多士師，畿輔歸陶鑄。名位日以崇，盛德了無預。昕夕惟閉門，讀書窮四部。墨妙宗平原，藝苑稱獨步。守己最矜嚴，接物轉謙恕。豈惟今所無，古人亦罕遇。時當一陽復，霜月掛庭樹。有客夜相過，蕭然兩芒屨。秉燭開西軒，淒冷如澗戶。自言新篋熟，可以恣良晤。旅舍何必還，且留話親故。帝鄉非吾願，所樂山水趣。回思龍眠間，峰壑有佳處。行將脫簪組，逍遙賦歸去。未幾，其相即請告矣。

奉酬魏都憲石生

夙齡甘澹落，秉耒爲農夫。城市且不入，敢望遊京都？山鄉風土惡，昨人有豺獮。迫我出巖谷，遙遙涉江湖。行吟至輦下，冠蓋盈九衢。誰肯迴一顧，恤此山澤癯。魏公立臺端，高義雲天俱。忘其簪紱貴，樂交布衣徒。賢昆守江淮，竟甫先生。與我情最孚。因訪遺佚士，謬稱微賤軀。頃者謁公門，延納不須臾。假館憩我裝，授餐供我鋪。期我以深夜，飲我以醍醐。下問無別詞，孔顏暨程朱。窮理極淵藪，味道皆膏腴。旁通及風雅，六義非殊途。

始知卿相內，尚有真師儒。小子故狂簡，向學多艱虞。所願終此身，奉公爲楷模。女蘿本柔條，兔絲亦平蕪。得附松柏枝，千歲永不枯。

永平訪宋副憲玉叔

以下戊戌春作。

君昔官司農，弭節蕪江邊。是時我賣卜，逃名隱市廛。故人倏相遇，執手情歡然。飲我以酒漿，和我以詩篇。更念旅食艱，分俸至萬錢。感此不能報，胸臆長拳拳。明年江上別，歸種山中田。山中有猛虎，噬人無豪賢。巖穴難久居，辟讎走幽燕。京師冠蓋地，豈無綺紵緣。誰可告心曲，急難相周全。聞君奉朝命，保釐京東偏。道里未爲遠，曷敢憚山川。況有談叟偕，策衛風雪天。流觀山海勝，追思嘉隆年。與君賦新詩，塞上他日傳。豈直爲升斗，區區乞人憐。

謁夷齊廟 二首

驅馬出城西，悠悠涉灤水。問客何所之，言尋孤竹里。孤竹已千年，高丘尚餘址。砌石以爲城，築臺以爲峙。中有二聖人，儼然具冠履。我來謁祠下，徘徊復徙倚。因登祠後亭，蒼松四圍起。崖削臨深潭，沙明見游鯉。雖有重門在，年久勢將圯。敢告郡大夫，修葺胡

不美。
仲尼生周末，尚曰予殷人。何況墨台氏，九世爲商臣。孤竹雖小國，安忍忘所親。寧餓首陽山，必不會孟津。或謂微箕比，孔子稱三仁。三仁本同氣，矢死良有因。君乃夏后裔，二子又逸民。不仕則已矣，何爲殞厥身？此語雖中和，恐以僞亂真。無寧守臣節，庶幾完天倫。

贈盧龍李明府公治

漢儒經學多，吾愛鄭高密。易數既淵玄，詩箋又切實。其人不可見，其地猶可即。山川阻且長，憑軾知何日。頃者游盧龍，茂宰聲洋溢。於公爲同鄉，繼起通經術。性復好風雅，已入高岑室。我欲往從之，素履恐未悉。不知誰語君，枉駕先蓬輦。結交何必舊，傾蓋成膠漆。公退輒見招，書堂擁千帙。宛如通德里，疑義互相質。

贈華州東雲雛

東子舉孝廉，乃在思陵初。其時運全盛，雅不慕簪裾。結茅華山下，飽讀萬卷書。學成名亦隨，二十三年餘。今春來輦轂，下第游肥如。永平，古肥如國。與我聚旬月，氣誼良非疏。

贈君以一言，幸勿吐棄予。予鄉有高士，王湯及姚徐，王元倬、湯君木、姚文初、徐昭法。秉性嗜丘壑，從不對公車。君既負耆舊，祇合山中居。富貴是何物，肯以易樵漁。所願攻文詞，異代垂令譽。

聞吳錦雯授蘇州司理喜而有寄

山人好結交，交亦半天下。其中最愛我，莫若吳君者。我每一詩成，君必手自寫。古人嗜芟棗，其癖信非假。君嘗語同輩，吾但不爲官，苟微一命榮，安忍忘所歡。蠡山三十卷，誓必爲之刊。感此知己言，朝夕望彈冠。豈料十餘年，君尚困林藪。妻子未免饑，焉能顧朋友。今春赴禮闈，射策復不偶。天壇同我宿，中夜咨嗟久。亡何試銓曹，首選得司理。除授乃吳郡，通貴無與比。時我在北平，聞之躍然起。此方剗劂工，吾集得成矣。明日還都門，知君未出都，把酒先一酌，前言諒不渝。吾詩若果傳，君名亦與俱。千秋萬歲事，豈直潤微軀。

宋副憲玉叔見惠繭袍謝之

杜公居夔州，客遺細織段。逡巡不敢受，惡其太美煥。白公居江州，客寄輕綵布。愛其樸

而文，受之製重袴。我今居營州，故人爲監司。惠我山繭袍，古色如松脂。既非織段華，又比輕綵貴。雅稱山人服，服之有道氣。憶昔潤州城，與君兄弟居。衣我以萊葛，一着六年餘。此繭亦萊產，視葛尤渾堅，願言服無數，奚止十餘年。

無題

幽州白日寒，孟夏芳草綠。士女尚春游，牛車遞相續。車中八九女，美者顏如玉。春山隱翠眉，秋水凝曼睩。其俗喜豐艷，雖肥不傷肉。耻作漢宮粧，偏稱閼氏服。何必高高髻，玄髮盤幾曲，何必纖纖趾，青靴自平束。下車聊緩步，道路咸以目。始知人妍媸，不在頭與足。

夜泊張秋

夜泊張秋河，皓月盈沙渚。大小無幾舟，歷歷可指數。鄰船有寡婦，又攜一孤女。婦年三十餘，女年十四五。縞衣立舵樓，風度疑仙侶。遠視雖不真，月光照如許。夜半聞哭聲，其聲亦何苦。嗚咽澗下泉，慘淒江上雨。聽者不能寐，觸引愁千縷。借問誰家婦，鄉關在何所，良人幾時亡，何事來羈旅？母女暗吞聲，踟躕終不語。

夏鎮贈顧水部見山

去秋客彭城，駕言之帝鄉。策蹇豐沛道，買舟於夏陽。側聞顧使君，弭節此關梁。懷刺欲往謁，秋雨霑衣裳。篋有余生書，未獲手自將。舟師苦相促，浦帆去聲隨風揚。回首念伊人，蒹葭被新霜。其後宛溪友，過此登公堂。垂問及愚賤，高誼焉能忘。今秋薊門歸，又至泗水傍。停橈冀一晤，不似前芒芒。憶昔游雲間，所交俱老蒼。陳李彭宋輩，陳卧子、李存我、彭燕又、宋子建。唱和多詩章。思君未得見，至今猶彷徨。既見心則喜，話言豈尋常。幸不吝杯酒，飲我秋夜涼。四始與六義，或可共商量。

淮上遇姜侍御真源兼送其人都

我有四老友，漂泊江淮間。梁大寓寶城，杜二隱鍾山，王二與孫八，結伴棲邗關。四子高蹈人，況復工騷雅。孤情迴自立，濁世罕知者。至于富貴中，落落交益寡。惟有姜使君，巡陟莅揚州。折節與之友，唱和多綢繆。飢則餉其粟，寒則衣以裘。四子懷君惠，時時向人述。我雖未識君，同類感則一。苦吟三十卷，道遠無繇質。昨從京師回，遇君於淮陰。兩夜接杯畢，傾倒意何深。濱行貽我詩，不翅雙南金。秋風公路浦，揚帆待明發。黃河日夜

流，離情頓飛越。歸見杜王孫，相思共明月。是時仲木物故，惟于皇、于一、豹人在。

揚州訪柳鳳簷中丞感舊

神宗癸丑年，先子舉進士。雖官尚書郎，文名著燕市。是時柳太公，作令於涑水。謬與先子交，氣味若蘭芷。中丞甫弱冠，從游在宦邸。遙以文相質，擊節贊其美，并授以古法，私心感知已。遂結爲師弟，恩義金石比。所惜吳與蜀，山川阻且長。哲人先秋萎，遺孤口尚黃。未及聞庭訓，平生事茫茫。中丞懷舊恩，四十年不忘。一朝遇吾季，先爲道其詳。贈詩情淒切，讀之裂中腸。又贈篋中書，當路爲游揚。此道真古人，今人曷敢望！小子仰高風，恨未見顏色。昨歲來廣陵，公已入京國。及予游至燕，公又返江北。參差不得晤，惆悵意何極。頃者候公門，倒屣如舊識。垂問及生死，執手多歎息。無奈行忽忽，不獲長侍側。旅次撰此詩，聊以述明德。

七言古體

十三首

武林行贈陳胤倩處士

以下戊戌春夏作。

我年三十游武林，與君伯氏交最深。前侍御玄倩先生。是時君年甫二十，許身已比雙南金。蹉跎一別十餘載，日月遷流陵谷改。賢兄衣繡懷國恩，合室捐軀蹈東海。雁行中斷不勝情，甘隱湖山絕世榮。乾坤我亦同心者，千里相思空月明。去冬偶游至畿甸，聞君在此尋不見。豈意元宵燈火殘，太僕堂中共歡燕。當年君尚未生髭，只今于思復于思。我長十年更憂患，那能雙鬢不成絲。來朝策蹇訪我寓，手持一卷都門句。淚眼愁看北海一作關。雲，傷心多詠西山樹。因憶賢兄使大梁，迴車見枉花盞岡。金陵予舊居也。龍江一作關。又寄一書札，至今展看猶飛揚。彭咸靈均自千古，褚淵江總何足數。匹夫有志名亦傳，況兼風雅才如許。所愧先朝老逸民，無端奔走溷風塵。桃花水起合歸去，湖海煙波作比鄰。

空同行贈韓子新處士

盛明一作本朝。詩人李空同，刻畫少陵英魄雄。雖產北地家東維，卒葬禹州深山中。百二十

年封且樹，子孫零落東西去。羣盜焉知世所宗，伐其冢墓衣冠露。是時盧龍有韓生，道經山下魂暗驚。手拾遺骸入舊槨，重壘亂石成高塋。我聞此事足千古，欲見其人異鄉土。今歲驅車來北平，先問韓生何處所。韓生兄弟俱偉人，與我一見情自親。胸懷淵邃莫可測，風期亢爽無比倫。況能避世辭榮祿，其節彌堅志彌篤。管寧寧甘遼東卧，田疇不受烏桓辱。以此傾蓋如舊歡，草堂置酒春燈寒。坐中偶及禹州事，平生風義良可觀。此方孤竹古城在，二公子祠亦頽敗。明朝西隰雪初晴，策衛隨君往一拜。

射虎石歌

北平太守飛將軍，猿臂善射天下聞。霜郊曠遠喜出獵，歸時暝黑路不分。草間驚見一猛虎，拔箭射之深没羽。詰朝尋訪知是石，此石峨然遂千古。後人經此必徘徊，摩娑歎息思悠哉。安得將軍起泉下，百騎仍馳射雕者。

天台圖歌爲遷安劉明府初度

君不見列仙傳，王喬飛覺臨葉縣；又不見養生家，葛洪勾漏求丹砂。二公本是猿鶴侶，束帶折腰亦何取。從來傲吏多神仙，能以神明爲父母。我昔揚舲東海游，聞說仙人阮與劉。